

Puigdemont en praschun a Neumünster (Holstein)

Tge fa la Germania?

DA GUIU SOBIELA-CAANITZ

■ **Quai è stà l'eveniment da la dumengia da palmas: La polizia dal Schleswig-Holstein ha arrestà Carles Puigdemont (*1962), anteriur president da la Catalugna, sin in'autostrada sper il cunfin danais.** La «NZZ» dals 27 da mars scriva: «Il fundament era in cumond d'arrest europeic emess da la Spagna (...). La dumonda urgenta è sch'el vegnia extradit a la Spagna (...). Quai dastga decider mo la giustia» (p. 3). Il «Tages-Anzeiger» dals 26 da mars s'exprima autramain: «La Republica federala tudestga ha ses emprim praschunier politic (...). Activists catalans detegnids en praschuniers politics. Quai na manegian betg mo ils blers deputads en il parlament regional da Barcelona; i resulta era da las expertisas dal Ministeri beltg da giustia e dal Departament federal da giustia. Belgia e Svizra n'han betg ex-

tradì Puigdemont a Madrid, perquai ch'ellas na resguardan el betg sco in delinquent. Il conflict catalan è pia arrivà a Berlin (...). Pon ils stadis da l'Uniu europeica (UE) tolerar anc adina che Madrid prova da sfratgar in moviment democratic da massa cun praschuns e chastis pecuniars? Igl è cler che la giustia spagnola vul destruir l'existenza sociala ed economica dals activists catalans. Lezs n'èn però betg terrorists, mabain politichers legitimads d'elecziuns libras che dovran mo meds paschaivels (...). Bruxelles/Brussel ha fin ussa tralascià da far pressiuin sin la Spagna per tractativas cun la Catalugna en vista ad ina schliaziun politica. Quai sto ussa Berlin far» (p. 2). La «Süddeutsche Zeitung» (Minca) dals 26 da mars manegia: «La giustia dal Schleswig-Holstein n'astga betg ignorar ils motivs politics zuppads davos las renfatschas penales cunter Puigdemont (...). Ella na duess perquai betg l'extradir a Madrid.»



La polizia dal Schleswig-Holstein ha arrestà Carles Puigdemont, anteriur president da la Catalugna. Tge consequenzas ha quai per la Catalugna?